

Wie hebt an der erst teyl wie man das Astrolabium brauchen soll.

Das Erst Capitel.

Was das Astrolabium sey/vnd wie seine teyl
genandt werden,

Astrolabium ist ein rund Instrument mit vil crey-
sen oder circulen vñ linien/ das da in der Astrono-
mey vñ Geometrey nutzparlich mancherley weysß
gebraucht würt.

Astrolabium hat den namen von dem krichi-
schen wörtlein *αστρον* das ist auff teutsch souil gesagt als ge-
stirn/vnnd *λαβη* das heyst ein handtheb/vnd also heysts zu
gutem teutsch das gestirns handtheb. Darumb ist auß der
eygen krafft seines namens zu mercken/ das on alle andere
instrument in d Astronomey das vortrefflichest ist/ Dañ
durch das Instrument würt des gestirns lauff erkät/gleich
als mans mit einer handtheben gefasset hette / Desßhalb
Hermannus Contractus disem Instrument nit vnbitlich
so ein hoch lob gibt in seim andern büch/da er sagt/ welcher
der Astronomischen Kunst wissenheit vnnd der hymlischen
sphaeren/der gleich des geometrischen messens höherer Kund-
schafft zu wissen beger/vnd demselben mit gangem fleysß vnd
grund nachgeen wölle/damit ers auff das gewyssest vberkü-
me/der soll mit höchstem fleysß disß Instrument durchgrün-
den/dann das ist das recht fundament / auß wellichem alle
andre Instrumenta vnd sonnen vren irn vrsprung habenn.
Ptholomeus der aller hochberümpftist diser Kunst/ nent di-
les Instrument ein glatte oder ebne spher/dañ so mans recht
anschawet/so ist es nicht anders/dañ als ob man ein rechte
spher hette zu hauffen gedruckt/vnnd also auff ein pret oder
papier abkunterfehret oder abgemalet.

*ein tün
aspwan n
lanbewu*

*Was aströ
labium zu
teutsch ge
sagt sey*

*Blatte od
ebne spher*